

03 APR 2000

Mahkamah-Anwar

PEMBELAAN ANWAR MINTA MAAF KEPADA SAKSI

KUALA LUMPUR, 3 April (Bernama) -- Pembelaan Datuk Seri Anwar Ibrahim hari ini memohon maaf kepada seorang pegawai Kementerian Kewangan yang telah berada tujuh hari di Mahkamah Tinggi setelah mendapati beliau tidak diperlukan untuk memberi keterangan dalam kes liwat bekas timbalan perdana menteri itu.

Peguam utama Anwar, Christopher Fernando yang turut meminta maaf kepada mahkamah berhubung perkara itu berkata Abdul Salim Abdul Ghani bukanlah pegawai yang dimaksudkan dalam permohonan pembelaan kepada mahkamah untuk mengeluarkan sapina kepada saksi yang ingin mereka panggil.

"Terdapat kesilapan yang benar-benar tidak disegajakan di sini. Kami tidak memerlukan saksi ini. Ada sedikit kesilapan, kami meminta maaf atas kesulitan yang berlaku," kata Fernando kepada Hakim Datuk Arifin Jaka yang mendengar kes itu pada hari ke-94 perbicaraan.

Arifin turut meminta maaf kepada Abdul Salim mengenai perkara itu.

Anwar, 52, dibicarakan bersama-sama adik angkatnya Sukma Darmawan Sasmitaat Madja, 39, terhadap pertuduhan meliwat Azizan Abu Bakar, 39, di apartmen milik Sukma di Tivoli Villa, Bukit Bandaraya di sini, antara Januari dan Mac 1993.

Sukma, seorang ahli perniagaan, turut menghadapi tuduhan bersubahat dengan bekas menteri kewangan itu untuk meliwat Azizan, bekas pemandu peribadi isteri Anwar, di tempat dan pada masa yang sama.

Ketika disoal Arifin, peguam itu berkata, pegawai yang diperlukan ialah Ketua Setiausaha Perbendaharaan.

Bagaimanapun, Anwar kemudian menjelaskan kepada mahkamah bahawa beliau ingin memanggil seorang pegawai dari Kementerian Luar sebagai saksinya bagi mengesahkan tentang pemergiannya ke Bangkok pada tahun 1993 dan bukannya Ketua Setiausaha Perbendaharaan itu.

Esok mahkamah akan mendengar permohonan Menteri Kewangan Tun Daim Zainuddin dan Timbalan Menteri Pendidikan Datuk Aziz Samsudin untuk mengketepikan sapina yang dikeluarkan terhadap mereka.

Fernando memberitahu mahkamah bahawa saksi-saksi lain termasuk bekas menteri perdagangan dalam negeri dan hal ehwal pengguna Datuk Seri Megat Junid Megat Ayob dan isterinya, Norziela Jalil, akan dipanggil kemudian, bergantung kepada keputusan permohonan itu.

Peguam itu berkata keperluan untuk memanggil saksi-saksi berkenaan juga bergantung kepada keputusan mahkamah berhubung isu sama ada Perdana Menteri Datuk Seri Dr Mahathir Mohamad perlu memberi keterangan pada perbicaraan itu.

Mahkamah sebelum ini, telah menetapkan sehingga pukul 4 petang esok bagi Dr Mahathir, jika beliau ingin berbuat demikian, memfailkan afidavit jawapan terhadap permohonan Anwar sama ada keterangannya relevan atau tidak.

-- BERNAMA

NHD SBB RON